
ՄԱՍԻԿՈՆ ԳԵՎՈՐԳՅԱՆ

Մինչև վերջերս լույս տեսած հանրագիտարաններում¹, կենսագրական բառարանում² և գրական տեղեկատուներում³ լրագրող, բանասեր, թարգմանիչ, բառարանագիր, մշակութային գործիչ Մամիկոն Գևորգյանին ներկայացնող հոդվածներում հավուր պատշաճի չի լուսաբանված նրա կյանքը և գործունեությունը որպես XX դարի առաջին կեսի նշանավոր մտավորականներից մեկի:



Հայաստանի ազգային արխիվում գտնվեց Մ. Գևորգյանի ձեռքով՝ 1942 թ. հունիսի 8-ին լրացված «Կադրերի հաշվառման անձնական թերթիկ»-ը և ինքնակենսագրությունը⁴: Դրանցում կան փաստեր, որոնց մասին վերոնշյալ տեղեկատուներում որևէ հիշատակություն չկա:

Ինքնակենսագրության մեջ Մ. Գևորգյանը հայրանունը գրել է՝ Արտեմի, փակագծում՝ Հարությունի, իսկ անձնական թերթիկում՝ միայն Արտեմի, հետագայում միշտ գրել է Արտեմի:

Մ. Գևորգյանը ծնվել է 1877 թ. նոյեմբերի 17 (29)-ին, Նախիջևանի Ինքնավար Հանրապետության Օրդու-

բադի շրջանի Քաղաքիկ գյուղում: Նրա պապը հողագործ գյուղացի է եղել, հայրը՝ միջակ կարողության առևտրական: Սկզբնական կրթությունը ստացել է Ազուլիսի ծխական դպրոցում: Տասը տարեկանում տեղափոխվում է Մոսկվա: Սկզբում սովորում է Լազարյան ճեմարանում, որն ավարտում է 1897 թ., իսկ հետո ընդունվում է Մոսկվայի համալսարանի իրավաբանական ֆակուլտետը: 1901 թ. ավարտում է համալսարանը 1-ին կարգի դիպլոմով: Համալսարանում գրում է «Վաղ տիրապետության շրջանը ըստ ռուսական իրավունքի» թեմայով աշխատանք և արժանանում գովասանական գնահատանքի: Ավարտելուց հետո ընդունվում է փաստաբա-

¹ Հայկական սովետական հանրագիտարան, հ. 3, Երևան, 1977, էջ 20, տե՛ս նաև՝ Հայկական համառոտ հանրագիտարան, չորս հատորով, հ. 1, Երևան, 1990, էջ 640: Ով ով է. հայեր (կենսագրական հանրագիտարան), երկու հատորով, հ. 1, Երևան, 2005, էջ 280:

² Գ. Մ տ ե փ ա ն յ ա ն. Կենսագրական բառարան (հայ մշակույթի գործիչներ), երեք հատորով, հ. Ա, Երևան, 1973, էջ 242:

³ Հ. Խ ա չ ա տ ր յ ա ն. Գրական տեղեկատու, ՀՄԳՄ անդամներ, 1934-1974, Երևան, 1975, էջ 140-141: Հ. Խ ա չ ա տ ր յ ա ն. Գրական տեղեկատու, Երևան, 1981, էջ 90-91, ն ու յ ն ի՝ Գրական տեղեկատու, ՀՄԳՄ անդամներ, 1934-1986, Երևան, 1986, էջ 117-118:

⁴ Հայաստանի ազգային արխիվ, ֆ. 1, ց. 123, գ 3562Ա:

նական դաս և գրադվում առավելապես իրավախորհրդատվությամբ: 1901-1903 թթ. աշխատել է Մոսկվայում, 1903-1912 թթ. Թիֆլիսում, 1912-1916 թթ. Կոկանդում (Ուզբեկստան), որից հետո նորից տեղափոխվել է Թիֆլիս:

Արտասահմանյան ուղևորության Մ. Գևորգյանը մեկնել է երկու անգամ: 1901 թ. օգոստոսից նոյեմբեր եղել է Ֆրանսիայում (Փարիզ) և Գերմանիայում (Բեռլին): Երկրորդ անգամ ուղևորության է մեկնել 1906 թ. հուլիս-օգոստոս ամիսներին: Անձնական թերթիկում գրել է, որ եղել է Աթենքում, Հռոմում, Լյուցեռնում, Ցյուրիխում, Մյունխենում, Վիեննայում: Ինքնակենսագրության մեջ Մ. Գևորգյանը նշել է երկրները. դրանք են՝ Թուրքիա, Հունաստան, Իտալիա, Շվեյցարիա, Ավստրիա, Գերմանիա, Լեհաստան: Թուրքիան և Լեհաստանը անձնական թերթիկում նշված չեն:

1917 թ. փետրվարյան հեղափոխության ժամանակ Մ. Գևորգյանը ապրել է Թիֆլիսում: 1917 թ. մարտից մինչև 1919 թ. աշխատակցել է այստեղ լույս տեսնող «Кавказское слово» թերթին, որից հեռացել է, ինչպես գրում է Մ. Գևորգյանը, «թերթի ղեկավարության հայացքների հետ տարաձայնության պատճառով»: Նրա անվանը կարելի է հանդիպել 1917-1920 թթ. «Кавказское слово», «Слово» (Թիֆլիս) և «Тифлисский листок» (1906) պարբերականներում⁵:

1921 թ. գործուն մասնակցություն է ունենում Թիֆլիսի Հայարտան (Հայ արվեստի տուն) կազմակերպմանը և ընդգրկվում այդ խորհրդի կազմում որպես նախագահի (Հովհաննես Թումանյան) տեղակալ: Հայաստանի օգնության կոմիտե (ՀՕԿ) հիմնելու համար 1921 թ. օգոստոսին Երևանում կայանալիք խորհրդակցությանը Թիֆլիսից հրավիրվում են Հայարտան 18 անդամներ, ի թիվս որոնց՝ Հովհաննես Թումանյանը, Լեոն, Դերենիկ Դեմիրճյանը, Գարեգին Լևոնյանը, Մամիկոն Գևորգյանը և այլք: Խորհրդակցության ավարտից հետո ՀԽՍՀ կառավարության ղեկավար Ալեքսանդր Մյասնիկյանը իր մոտ գրույցի է հրավիրում Մ. Գևորգյանին, որին ճանաչում էր դեռևս Լազարյան ճեմարանից և առաջարկում ստանձնել Պետական թատրոնի տնօրենի պաշտոնը: Միաժամանակ ասում է, որ այդ առաջարկն անում է Պողոս Մակինցյանի և Ասքանազ Մռավյանի խորհրդով:

1921 թ. օգոստոսի 16-ին Հայաստանի ժողովրդական կոմիսարների խորհուրդը հաստատում է Երևանում պետական թատրոն ստեղծելու առաջարկը և թատրոնի կազմակերպման գործը հանձնարարում Պողոս Մակինցյանին, Լևոն Քալանթարին և Մամիկոն Գևորգյանին⁶: Մ. Գևորգյանը դառնում է Պետական թատրոնի առաջին տնօրենը և 1921-1928 թթ. ոչ մեծ ընդմիջումներով վարում այդ պաշտոնը:

«Խորհրդային Հայաստան» թերթում հայտարարություն է տպագրվում, որ «ՀԽՍՀ Լուսժողկոմը ընձեռել է նախապատրաստական աշխատանք գրական-գիտական, հասարակական և քաղաքական «Նորք» պարբերական հանդեսի հրատարակման»⁷: Հանդեսի խմբագիրներ էին նշանակված Ա. Հովհաննիսյանը, Պ. Մակինցյա-

⁵ Кавказское слово, 1917, № 159, 217, 226, 233, 258, 263, 267, 275, 282; 1918, № 3, 7, 24, 37; 1919, № 142, 167; Слово, 1919, № 12,55; 1920, № 245, 247, 269, 274, 286; Тифлисский листок; 1906, 1 116. Տե՛ս Բ. Մ. Հ ո վ ա կ ի մ յ ա ն. Հայոց ծածկանունների բառարան, Երևան, 2005, էջ 511:

⁶ Հայ սովետական թատրոնի պատմություն, Երևան, 1967, էջ 18:

⁷ «Խորհրդային Հայաստան», 1. VI. 1922:

նր և Ա. Մոսվյանը: Խմբագրության պատասխանատու քարտուղար է նշանակվում Մ. Գևորգյանը՝ մնալով հանդերձ թատրոնի դիրեկտորի պաշտոնում⁸: Նշենք, որ «Նորք» հանդեսի խմբագրությունը տեղավորված է եղել Պետական թատրոնի շենքում:

1928 թ. Մ. Գևորգյանը նշանակվում է Ա. Մյասնիկյանի անվան պետական հանրային գրադարանի (ներկայումս՝ Հայաստանի ազգային գրադարան) տնօրեն՝ Երվանդ Թադիանոսյանից հետո: Այս կարևոր իրողության մասին տեղյակ ենք դարձել պատահաբար, քանի որ նրա անունը՝ որպես տնօրենի, ընդհանրապես չի շրջանառվել:

Հայաստանի ազգային գրադարանի արխիվում պահպանվում է հրամանի գիրք, որի կազմի վրա գրված է հետևյալը. «Հայկ. ՄՍՀ Լուսավորության ժողովրդական կոմիսարիատ. Ա. Ֆ. Մյասնիկյանի անվան պետական հանրային գրադարան: Ընդհանուր բաժին. գործ № 1 (ըստ երևույթին հետագայում է նշվել № 1 – Ռ. Ղ.): Հանրային գրադարանի հրամանի գիրք. սկսված է 18 մայիսի 1931 թիվ ավարտված է 7 հոկտեմբերի 1931 թիվ [ընդ որում 1932 թիվ է գրված եղել, սակայն 193(2)-ի վրա 1 է դարձվել և թվի տակ մատիտով նույնպես գրվել է 1931: Այսինքն՝ ճշտվել է համապատասխանեցնելով բովանդակությանը – Ռ. Ղ.]: Բաղկացած է 64 թերթից»:

Հրամանի գիրքը սկսվում է № 21 հրամանով, որը թվագրված է 1931 թ. մայիսի 18-ին: Սա վկայում է այն մասին, որ դրանից առաջ եղել է նաև մեկ ուրիշ գիրք, որտեղ գրանցվել է մինչև № 20-ը եղած հրամանները: Այս գրքում գրանցված է մինչև № 75-ը, ընդգրկող հրամանները, որը թվագրված է 19 հոկտեմբերի 1931 թվական, այսինքն՝ ավարտված է ոչ թե հոկտեմբերի 7-ով, այլ 19-ով: Հրամանագրքի 75-րդ հրամանից հետո առանձին թղթերի վրա գրված են հրամանների տեքստեր, որոնք հետո են անցկացվել վերոհիշյալ հրամանագրքի մեջ:

Հրամանագիրքը նայելիս պարզվեց, որ 1931 թ. հունիսի 25-ի № 29 հրամանը ազդարարում է, որ «Համաձայն Լուսժողկոմի ա/թ. հունիսի 4-ի № 10 հրամանի § 1-ի և ա/թ. հունիսի 16-ի լրացուցիչ հրամանի, սույն թվից Հանրային գրադարանի դիրեկտորի պաշտոնը հանձնեցի նոր նշանակված դիրեկտոր ը. Մուրեն Մարկոսյանին: Դիրեկտոր (ստորագրությունը Մ. Գևորգյանին է – Ռ. Ղ.)»: Նույն օրվա № 30 հրամանում գրված է, որ «Համաձայն Լուսժողկոմի ա/թ. հունիսի 4-ի № 10 հրամանի § 1-ի և ա/թ. հունիսի 16-ի լրացուցիչ հրամանի, սույն թվից ստանձնեցի Հանրային գրադարանի դիրեկտորի պաշտոնը: Դիրեկտոր (ստորագրությունը Մ. Մարկոսյանին է – Ռ. Ղ.)»:

«Գրադարանային գործի պատմությունը Սովետական Հայաստանում» փաստաթղթերի և նյութերի ժողովածուի առաջին հատորում (1920–1941) գետեղված № 72 փաստաթուղթը (էջ 113) վկայում է, որ մինչև առնվազն 1928 թ. մարտի 1-ը գրադարանի տնօրեն է եղել Ե. Թադիանոսյանը:

Մեկ այլ փաստաթուղթ (№ 78, էջ 128–130), որը ենթադրաբար վերագրվում է 1929 թ., որպես գրադարանի տնօրեն նշված է Հ[ակոբ] Զորյանը:

Վերոնշյալ փաստաթղթերի ժողովածուում 1928–1932 թթ. ժամանակահատվածի համար ներկայացված է 28 փաստաթուղթ (№ 71–98, էջ 113–156): Դրանցից միայն –

⁸ Հիշողություններ Եղիշե Զարենցի մասին (Զարենցի հետ), Երևան, 1961, էջ 258–259:

82-ում⁹ (1929 թ. 29 հունվարի) է նշված Մ. Գևորգյանի անունը: Փաստաթղթի բովանդակությունից չի երևում, որ Մ. Գևորգյանը գրադարանի տնօրեն է եղել, ուղղակի պետք է ենթադրել:

Մի իրողության մասին ևս: Վերոնշյալ փաստաթղթերի ժողովածուի էջ 308–321-ում տրված է «Ժողովածուում չընդգրկված արխիվային փաստաթղթերի ցանկ», որտեղ նկարագրված 28 փաստաթուղթ տեղ չեն գտել ժողովածուում: Գուցե՞ դրանց մեջ հիշատակված լինի Մ. Գևորգյանի անունը: Ինչնէ:

Մ. Գևորգյանը գրադարանի տնօրեն է եղել 1928–1931 թթ. հունիսի 16-ը, իսկ հաջորդ տնօրեն Սուրեն Մարկոսյանի հետ հանձնում-ընդունումն ավարտվում է հունիսի 25-ին:

Իր անձնական թերթիկում Մ. Գևորգյանը գրել է, որ Հանրային պետական գրադարանի տնօրեն է եղել 1928–1932 թվականներին, իսկ դրանից հետո՝ 1932–1933 թթ. եղել է Հայաստանի պետական օպերայի և բալետի թատրոնի տնօրեն, որը կազմակերպվել ու բացվել է նրա անմիջական ջանքերով:

1934-ին Մ. Գևորգյանը իր ցանկությամբ տեղափոխվում է Հայկինո՝ գրական-գեղարվեստական խորհրդականի և կինոսցենարիստի պաշտոնով: Անձնական թերթիկում նա գրել է, որ Հայկինո է տեղափոխվել 1933-ին և աշխատել է մինչև 1937-ը:

1936 թ. Մ. Գևորգյանը դառնում է Հայաստանի խորհրդային գրողների միության անդամ, գրադավում է դրամատուրգիայով, կինոդրամատուրգիայով և թարգմանություններով:

Անձնական թերթիկում Մ. Գևորգյանը նշում է, որ 1937–1941 թթ. գրադվել է գրական գործունեությամբ: Դժվար չէ պատկերացնել, որ գրական գործունեության անցնելը պայմանավորված է եղել նրա նկատմամբ բռնաճնշումներով: Ինչպես ժամանակի բազմաթիվ մտավորականներ, այնպես էլ Մ. Գևորգյանը կանգնել է դատարանի առջև: Իր ինքնակենսագրության մեջ Մ. Գևորգյանը գրում է, որ 1939 թ. դատի է տրվել ՀԽՍՀ ՔՕ 67 և 68 հոդվածներով: Բացենք Քրեական օրենսգիրքը և կարդանք 67 հոդվածը. «Պրոպագանդի կամ ազիտացիայի համար, որով կոչ է արվում տապալելու, քայքայելու կամ թուլացնելու Խորհրդային իշխանությունը կամ հակահեղափոխական այս կամ այն առանձին հանցագործություն կատարելու (այս Օրենսգրքի 59–66-րդ հոդվածներով), այլև նույն բովանդակությամբ գրականություն պատրաստելու, պահելու և տարածելու համար կիրառվում է՝ ազատազրկում ոչ պակաս քան վեց ամիս ժամանակով:

Նույն այդ գործողությունների համար, եթե նրանք կատարվել են մասսայական խռովությունների ժամանակ կամ օգտագործելով մասսաների կրոնական կամ ազգային նախապաշարմունքները կամ պատերազմական պայմաններում և կամ պատերազմական դրության մեջ հայտարարված վայրում, կիրառվում են՝

այս Օրենսգրքի 59-րդ հոդվածով նախատեսված սցիալական պաշտպանության միջոցները»¹⁰:

⁹ Փաստաթուղթը վերնագրված է՝ «Հանրային գրադարանի խորհրդին կից Հովհ. Թումանյանի ծննդյան 60-ամյակի տոնակատարության առթիվ կազմված հանձնաժողովի նիստի արձանագրությունից»:

¹⁰ Հայկական ԽՍՀ քրեական օրենսգիրք, Երևան, 1938, էջ 51-52:

Իսկ ի՞նչ էին նախատեսում 59-րդ հոդվածի սոցիալական պաշտպանության միջոցները. «Սոցիալական պաշտպանության միջոցի առավելագույն չափը – գնդակահարություն կամ աշխատավորության թշնամի հայտարարելը՝ գույքի կոնֆիսկացիայով և միութենական հանրապետության, իսկ դրա հետևանքով նաև ԽՍՀՄ Միության քաղաքացիությունից զրկելով և ընդմիջտ արտաքսելով ԽՍՀՄ Միության սահմաններից: Մեղմացնող հանգամանքներ լինելու դեպքում թույլատրվում է սոցիալական պաշտպանության միջոցն իջեցնել մինչև ազատազրկում ոչ պակաս քան երեք տարի ժամանակով, ամբողջ գույքի կամ նրա որոշ մասի կոնֆիսկացիայով»¹¹:

ՀԽՍՀ ՔՕ 68-րդ հոդվածը առավել պարզաբանում և հստակեցնում է ամբողջական պատկերը: Ահավասիկ. «Ամեն տեսակ կազմակերպչական գործունեության համար, որի նպատակն է այս գլխում նախատեսված հանցագործություններից որևէ մեկը նախապատրաստելու կամ կատարելու նպատակով ստեղծված կազմակերպությանը մասնակցելու համար կիրառվում են.

այս գլխի համապատասխան հոդվածներում նախատեսված սոցիալական պաշտպանության միջոցները»¹²:

Դժվար չէ պատկերացնել, թե ինչպիսի հոգեկան դրամա է ապրել Մ. Գևորգյանը՝ իմանալով իրեն առաջադրված մեղադրանքների մասին: Այնուամենայնիվ, կարծում ենք, որ Մ. Գևորգյանի իրավաբանական կրթությունը և նախկինում փաստաբանությամբ զբաղվելը այս դեպքում օգտաշատ են եղել: ՀԽՍՀ Գերագույն դատարանի դատական կոլեգիայի 1939 թ. ապրիլի 29-ի որոշմամբ նա լիովին արդարացվել է:

1941 թ. դեկտեմբերին Մ. Գևորգյանը նշանակվում է Հեղինակային իրավունքների պահպանության Համամիութենական վարչության հայկական բաժնի տնօրեն:

Մ. Գևորգյանը զբաղվել է նաև գիտական գործունեությամբ: Հայաստանի ազգային գրադարանի «Հակոբ Մանանդյանի ֆոնդ»-ում պահպանվում է նրա գրած ատենախոսության սեղմագիրը. Геворгян М. А. История Армении Фауста Бузанда: Автореферат диссертации на соискание ученой степени кандидата филологических наук. Ереван 1949. 15 с.

ՀԽՍՀ գիտությունների ակադեմիայի պատմության ինստիտուտը 1953 թ. հրատարակել է Փավստոս Բուզանդի «Հայոց պատմություն»-ը¹³, որի թարգմանությունը գրաբարից ռուսերեն և ծանոթագրությունները կատարել է Մ. Ա. Գևորգյանը: Գրքի առաջաբանը գրել է ակադեմիկոս Սուրեն Երեմյանը:

Հիշատակելի է Մ. Գևորգյանի «Մ. Ա. Գրիբոյեդով» գիտական աշխատությունը¹⁴:

Մ. Գևորգյանը թարգմանել է Խաչատուր Աբովյանի «Վերք Հայաստանի» վեպը, որի կրճատ տարբերակը հրատարակվել է 1948 թ.¹⁵: «Վերք Հայաստանի» վեպի 1955

¹¹ Նույն տեղում, էջ 44-45:

¹² Նույն տեղում, էջ 52:

¹³ История Армении Фавстоса Бузанда. Пер. с древнеарм. и ком. М. А. Геворгяна, под ред. С. Т. Еремяна, вступит. статья Л. С. Хачикяна. Ереван, 1953.

¹⁴ «Նոր ուղի» (Գրական-գեղարվեստական, հասարակական, քաղաքական, տնտեսական և գիտական ամսագիր), Երևան, 1929, № 2-3, էջ 207-214:

¹⁵ Х. А б о в я н. Избранное. М., 1948, с. 15-144.

թ. հրատարակությունն ամբողջական է: Բառացի թարգմանությունը կատարել է Մ. Գևորգյանը, գրական թարգմանությունը՝ Ս. Շերվինսկին¹⁶: «Վերք Հայաստանի» վեպի մի հատված լույս է տեսել «Братство» ժողովածուում 1957-ին¹⁷:

Ըստ Գ. Ստեփանյանի «Կենսագրական բառարան»-ի և Հ. Խաչատրյանի «Գրական տեղեկատու»-ի, Մ. Գևորգյանը ռուսերեն է թարգմանել նաև Գ. Սունդուկյանի «Խաթաբալա»-ն և Ալ. Շիրվանզադեի «Պատվի համար»-ը: Հայկական սովետական հանրագիտարանում վերոնշյալ գործերի թարգմանության մասին որևէ հիշատակություն չկա: Մեզ չհաջողվեց մատենագիտական աղբյուրներում գտնել «Խաթաբալա» և «Պատվի համար» գործերի թարգմանության հրատարակությունները:

Սակայն որոնումների ընթացքում պարզեցինք, որ Մամիկոն Գևորգյանը թարգմանել է նաև Ակսել Բակունցի «Միրհավ»-ը, որը զետեղվել է ռուսերեն լույս տեսած երկու ժողովածուում¹⁸, ինչպես նաև Սուրեն Այվազյանի պատմվածքները, որը հրատարակվել է 1956-ին¹⁹:

Մ. Գևորգյանը ռուսերենից հայերեն է թարգմանել Ա. Պուշկինի «Ճանապարհորդություն դեպի Արզրում» գործը, որն ունեցել է չորս հրատարակություն²⁰: Իսկ Ալեքսանդր Օստրովսկու «Արդյունավոր պաշտոն» հինգ գործողությամբ կոմեդիան և «Անօժիտը» չորս գործողությամբ դրաման (վերջինիս թարգմանությունը Արշ. Տեր-Հովնանյանի հետ) լույս են տեսել 1948-ին²¹:

Գրել է մի քանի դրամա, որից երկուսը՝ «Փառանձեմ» և «Վարդագար» խաղացվել են հայ բեմերում: 1922 թ. հունվարի 25-ից մայիսի 31-ը Մ. Գևորգյանի «Վարդագար» պիեսը չորս անգամ ներկայացվել է Պետական թատրոնում²² (այժմ Գ. Սունդուկյանի անվան ազգային ակադեմիական թատրոն) Լևոն Քալանթարի բեմադրությամբ: «Խորհրդային Հայաստան» թերթում ընդարձակ տեղեկատվություն է տպագրվել «Վարդագար» պիեսի և նրա սյուժետային զծի մասին²³: «Վարդագար» պատմահոգեբանական դրամայում «հեղինակն արծարծում է մարդկային անհատի ազատության, պարտքի զգացման և սիրո պրոբլեմները, դրա համար գտնելով հոգեբանորեն

¹⁶ X. A б о в я н. Раны Армении. Скорбь патриота [Лит. перевод С. В. Шервинского по дословному переводу М. А. Геворгияна. Вступит. статья С. М. Базьяна с. V–XXIV]. Ереван, 1955.

¹⁷ Братство. Литературно-художественный сборник писателей Закавказья. Ереван, 1957 (X. A б о в я н. Раны Армении (отрывок из одноименного романа. пер. М. Геворгиян, с. 293–298).

¹⁸ А. Б а к у н ц. Фазан.– Антология армянской советской литературы. Вып. XVI, Ереван, 1957 с. 154–158.

А. Б а к у н ц. Фазан.– Избранные страницы советской армянской литературы. Проза. Ереван, 1960, с. 205–212.

¹⁹ С. А й в а з я н. Зангезурские рассказы. Ереван, 1956.

²⁰ Մ. Մ. Պ ու շ կ ի ն. Ճանապարհորդություն դեպի Արզրում, Երևան, 1937, և ու լ յ ն ի՝ Ճանապարհորդություն դեպի Արզրում, երկրորդ հրատ, Երևան, 1937 («Պուշկինյան գրադարան» մատենաշար), և ու լ յ ն ի՝ Ընտիր երկեր. երեք հատորով, հ. 2. Երևան, 1937 («Ճանապարհորդություն դեպի Արզրում», թարգմ. Մ. Գևորգյան, էջ 273–329), և ու լ յ ն ի՝ Հեքիաթներ, բանաստեղծություններ, արձակ էջեր: Միհատորյակ մանուկների և պատանիների համար, Երևան, 1937 (մի հատված «Ճանապարհորդություն դեպի Արզրում» գրքից, թարգմ. Մ. Գևորգյան, էջ 141–156):

²¹ Տե՛ս Մ. Ն. Օ ս տր ո վ ս կ ի. Ընտիր երկեր: Կազմեց և խմբագրեց Մ. Պայազաստ, Երևան, 1948, էջ 43–88, 289–333:

²² «Խորհրդային Հայաստան», 10. VI. 1922:

²³ «Խորհրդային Հայաստան», 30. V. 1922:

պատճառաբանված, դրամատիզմով հարուստ, արտաքին մեղողրամատիկ էֆեկտներից զերծ լուծում»²⁴: Վարդագարի դերը համանուն դրամայում խաղացել է Լևոն Քալանթարը²⁵:

Մ. Գևորգյանը գրել է «Գիքոր» ֆիլմի սցենարը (բեմադրող Ամասի Մարտիրոսյանի հետ), ինչպես նաև «Շունն ու կատուն» մուլտիպլիկացիոն ֆիլմի սցենարը, «Պեպո» գեղարվեստական ֆիլմի լիբրետոն և այլն:

Ե. Չարենցի անվան գրականության և արվեստի թանգարանի՝ «Գրական թերթ»-ի ֆոնդում պահպանվում է Մ. Գևորգյանի «Ինժեներ Դարբինյան» անտիպ պիեսը:

Մ. Գևորգյանի գրական գործունեությունն այնքան ակնառու է եղել, որ նրան ժամանակակից արվեստագետ, Հայկական ՄՍՀ արվեստի վաստակավոր գործիչ Դանիել Դգունին նրա անունը որպես գրողի և սցենարիստի նշել է Ա. Բակունցի, Մ. Մանվելյանի, Ե. Չուբարի կողքին²⁶:

Հասկապես նշանակալից է Մ. Գևորգյանի ներդրումը հայ բառարանագրության գործում: 1943–1960 թթ. նա աշխատել է ՀՍՍՀ ԳԱ լեզվի ինստիտուտում: 1945-ին լույս է տեսել Ռուս-հայերեն բառարան, որը նա կազմել և խմբագրել էր հայտնի գիտնականների հետ²⁷:

Մ. Գևորգյանի գործունեությունը Ռուս-հայերեն քառահատոր բառարանի ստեղծման գործում դժվար է գերազնահատել: Նա եղել է բառարանի այն ակտիվ կազմողներից և խմբագիրներից մեկը, ում անունը կա չորս հատորում: Այդ հիմնարար աշխատանքին իրենց մասնակցությունն են բերել այնպիսի մեծանուն լեզվաբաններ, ինչպիսիք են՝ Գրիգոր Ղափանցյանը, Արարատ Ղարիբյանը, Էդվարդ Աղայանը և ուրիշներ²⁸:

Մ. Գևորգյանի կյանքի ուշագրավ իրողություններից էր նրա մտերմությունը Եղիշե Չարենցի հետ: Այն սկիզբ է առել 1921-ի հուլիսին Թիֆլիսի հանդիպումով, ապա զարգացել Մ. Գևորգյանի Երևան տեղափոխվելով, ուր երկուսն էլ սկզբնական շրջանում ապրել են «Ֆրանսիա» (ներկայիս «Երևան») հյուրանոցում, «Նորք» ամսագրի հրատարակման շրջանում և տևել մինչև Չարենցի եղերական վախճանը: Հայտնի են ավելի քան 10 նամակ, որ Չարենցը գրել է Մ. Գևորգյանին:

Նամակներից մեկում նա գրում է.

«Միրելի Մամիկոն,

Ես շատ դժգոհ եմ քեզնից, որ մինչև օրս դու ոչ մի անգամ ինձ չես այցելել: Մի թե երբնիցե ես քեզ հետ եղե՞լ եմ այլ հարաբերության մեջ, քան սրտառույց:

²⁴ Բ. Հ ա ր ու թ յ ու ն յ ա ն. Հայ սովետական թատրոն. 1917-1977, Երևան, 1985, էջ 24:

²⁵ Մ. Հ ա ր ու թ յ ու ն յ ա ն. Սովետահայ թատրոն (1917-1932), Երևան, 1968, էջ 89:

²⁶ Հիշողություններ Եղիշե Չարենցի մասին (Չարենցի հետ), Երևան, 1961, էջ 268:

²⁷ Ռուս-հայերեն բառարան, կազմեցին և խմբագրեցին Ա. Ս. Ղարիբյան, Ե. Գ. Տեր-Մինայան, Մ. Ա. Գևորգյան, Երևան, 1945:

²⁸ Ռուս-հայերեն բառարան, չորս հատորով, Երևան, հ. 1, 1954, 752 էջ, հ. 2, 1956, 688 էջ, հ. 3, 1957, 800 էջ, հ. 4, 1958, 808 էջ:

Անցիր, երբ ուզում ես, միայն երեկոյան ժամերին՝ 6-10-ը:

Քո՛ Չար

<29 VI, 1936, Երևան>²⁹:

Այսպես կարող էր գրել, Չարենցի արտահայտությամբ, «սրտառու» հարաբերություններ ունեցողը:

Ե. Չարենցը մակագրությամբ մի քանի գիրք է նվիրել Գևորգյանին: Այսպես, «Էպիքական լուսաբաց» գրքի վրա մակագրել է. «Միրելի Մամիկոնին, խորը սիրով, որ ինձ սովորեցրեց սիրել պոետներից ամենապայծառին ու վսեմին՝ Պուշկինին: Եղիշե Չարենց. 1930-23.1, Երևան»³⁰: «Ես իրավունք ունեմ պարծենալու այդ մակագրությամբ»³¹, – գրել է հետագայում Մ. Գևորգյանը:

Մ. Գևորգյանն ունեցել է երկու գավակ: Աղջիկը՝ Եկատերինան, ծնվել է 1921-ին, տղան՝ Վահանը, 1925-ին: Այրել են Երևանում՝ Մաշտոցի պողոտայի 20 շենքի բնակարան 7-ում:

Մ. Գևորգյանը մահացել է 1962 թ. հունիսի 17-ին Երևանում:

ՌԱՖԻԿ ՂԱԶԱՐՅԱՆ

²⁹ Ե. Չ ա ր ե ն ց. Երկերի ժողովածու, հ. 6, Երևան, 1967, էջ 456:

³⁰ Հիշողություններ Եղիշե Չարենցի մասին (Չարենցի հետ), էջ 262:

³¹ Նույն տեղում: